

清儒學案

世章



欽定四庫全書

欽定四庫全書

清儒學案卷四十九

天津徐世昌

高安學案

興祿正一身以正家國天下者其禮乎清代名臣大儒莫不以
不實是爲兢兢健庵味經其尤著者也可亭爲儀禮節略一書
一以經傳通解爲宗而刪繁舉要博采諸家附以獨見所
言皆明白洞達可謂知本務矣述高安學案

朱先生軾

朱軾字若瞻號可亭高安人康熙甲戌進士改庶吉士散館授
潛江知縣以薦入爲刑部主事轉員外郎郎中督陝西學政以
關中先儒張子知禮成性變化氣質之學爲諸生摩刮秦士大
悅厯光祿寺少卿奉天府尹通政使出爲浙江巡撫擢左都御

史雍正二年拜文華殿大學士兼吏部尙書坐撫浙時失察呂
留良私書吏議革職命仍視事尋還職兼管兵部尙書事高宗
御極命協辦總理事務賜世襲雲騎尉充纂修三禮館總裁官
乾隆元年卒贈太傅諡文端先生爲政練達有體自治縣及撫
浙未嘗假賓佐摘發多洞中吏不能爲奸浙俗浮靡以身教儉
郡邑吏望風自飭及登政府視山西賑治浙江海塘與怡親王
同籌畿輔營田水利乾隆初疏陳四川廣西河南丈田報墾之
不實又言法吏以嚴刻爲能請嚴飭各行省皆見施行向之以
興利爲功者相繼罷去忠誠爲國有古大臣之誼其學以敬爲
主以致知力行爲工夫以經史爲法守以日用云爲爲實驗著
周易傳義合訂十二卷因程子易傳朱子易本義互有異同爲
參校以歸一是不復兩可其說以滋歧貳惟兩義各有發明可

以並行不悖者仍俱錄焉而附以諸儒之論其諸儒之論有實勝傳義者則竟舍傳義以從之己所見亦各附於後又著儀禮節略二十卷分冠昏喪祭四大綱而冠禮後附以學義昏禮後附以士相見鄉飲酒於喪祭二禮尤詳大旨以朱子家禮爲主雜採諸儒之說而斷以己意蓋欲權衡於今古之間故於今禮多所糾正於古禮亦多所變通又有春秋鈔十卷孝經注一卷名儒傳八卷名臣傳三十五卷續編五卷循吏傳八卷文集四卷輶車雜錄廣惠編各若干卷

參史傳 四庫全書提要 張廷玉撰墓誌銘 學案小識

文集

周易傳義合訂凡例

一本義經傳分釋而詳於經略於傳今合經傳文於一處傳以解經傳義明而經旨了然矣

一講易以程傳朱義爲宗二書互有同異今止錄其一同者無容重複異者恐滋歧貳也其或各有發明則仍並錄焉傳義之後閒引諸儒論說而附鄙見於其末亦有止錄諸儒語不及傳義者傳義或不如諸儒所論之切當也亦有止陳鄙見者或舊解太繁撮其大要而述之或一知半解於先儒少有發明也若穿鑿以示異勦竊以立名則吾所不敢

一講易遺象言理自王輔嗣始至伊川程子又闡發而歸於正道而後納甲飛伏等術數之學息矣然易者象也有象斯有理理從象生也孔子彖象二傳何嘗非言象乎無論雷風山澤以及說卦所舉乾馬坤牛震龍巽雞之類皆象也卽卦之剛柔上下爻之應比承乘何莫非象乎舍是而言理吾不知所謂理者安在矣易道之取類大精粗巨細無所不有卽納甲飛伏等術

數之學不可謂非易之一端也矧中爻互卦倒巽倒兌厚離厚坎之象皆卦體之顯而易明者乎今釋卦爻一遵程朱德位時及承乘應比往來上下之義閒有艱晦難明者並取互卦等象釋之

一八卦除乾坤坎離外實止二卦倒震卽艮倒巽卽兌也六十四卦者八其八三十六宮者六其六也四十八卦中四正反大小過中孚頤對易也其屯蒙等二十八宮反易也反易之義先儒言之已備來矣鮮謂之卦綜謬矣又卦卦以此取義而矜爲孔子以後獨得之祕謬之又謬也今除泰否損益顯有反易相因之義其餘槩弗取焉

一程子不取卦變之說謂凡卦皆自乾坤來然合之彖傳畢竟有未盡協今一遵朱子一陰一陽自姤復之說詳見圖義

一宋元以來易圖不下數千於四聖人之精義全無干涉今一槩不錄止以鄙見縷晰朱子篇首各圖之義而圖仍不載

春秋鈔總論

孔子曰我欲載之空言不如見之行事之深切著明也時至春秋大道隱矣聖人周流列國所進說於人主及退而設教與七十子之徒講習而討論者無非闡明堯舜禹湯文武相傳之心法而聖人以爲是皆載之空言也今夫名山大川遊覽所不至考之記載而知某水某邱之勝槩與夫雲霞之蒸蔚變幻鳥獸木石之珍奇光怪心焉慕之而未之信也有繪圖示之者曰此某水某邱之勝也雲霞之蒸蔚變幻鳥獸草木之珍奇光怪也則不啻親履其地矣春秋之作二百四十年之圖畫也言道者曰如此則忠如此則孝如此則不忠不孝而爲天理王法之所

不容智者喻而愚者懵焉比讀春秋乃知若而人之甘心不忠不孝如是也若而人之陷於不忠不孝而不自知如是也微惡必懲隱慝必誅天理王法昭然不爽如是也於是善者謹覆轍凜殷鑒不善者如照秦鏡自見其形容自呈其心術儼然刀鋸斧鉞之刺於心而戮於身矣程子曰五經如藥方春秋猶用藥治病方書所載某方祛寒某方已熱盧扁未敢信其必然也迨用某方投某病而果無不效也斯庸醫知所遵循矣春秋對症施藥方則堯舜禹湯文武之所傳授也孔子酌而劑之以適於用而二百四十年風魔妖妄之疾霍然起矣

朱子語類云孔子作春秋據他事實書之教人見得當時事是如此又曰聖人不過直書其事而義自見果爾則齊桓晉文之事舊史具在孔子之作不幾多事乎且晉之乘楚之檇杌皆勸

善懲惡之書也何必魯之春秋又曰以日月名字上寓褒貶聖人不解恁地細碎且忽用此說以誅人又用此說以賞人使人求之而莫識其意是後世弄法舞文之吏之所爲也案春秋編年之書雖無事必備載四時至事有以日計者則書日不可以日計則書月不可以月計則書時原無關於是非之義也若書人書爵書名書字則魯史舊文也孔子曰吾猶及史之闕文蓋言史官之慎也韓宣子聘魯見易象春秋曰周禮盡在魯矣是春秋舊史典禮昭然非他國可比若忽而書名忽而書字絕無取義信筆記錄雜亂無章卽晉乘檮杌未必如是草率也況孔子作春秋以教天下萬世肯任舊文之參差而不爲校正乎蓋以官爵名字寓褒貶乃史官定例聖人據事考義可因者因之不可因者改而正之閒有變例或予之爵諡以重其罪或責備

賢者而嚴其辭是皆確乎有據無可疑者若義不可通則簡編之誤闕之可耳蓋經文從三傳錄出而三傳所載字句時有參差先儒謂由口授數傳而後不免訛誤今必欲逐字引例委曲以求其同則鑿矣

史家編年記事有綱有目綱斷而目案也事之本末目已詳矣乃酌理原情斷以片言而獄成焉後之讀史者不得於綱而稽其目猶有疑焉則究隱察微更進一解而是是非非之精意出矣孔子之所修者綱也目以記事無俟聖人之筆削後人因非孔子所定遂從而佚之目佚而傳作傳卽目也左氏詭異浮誇無當於聖人之取義而事之不泯猶賴有此論者謂屬事比辭春秋敎也魯桓弑於齊而莊公主齊婚與齊人狩大無麥而築郕告糴于齊而新延廋凡此皆比而觀之而美惡自著何必詳

其事而後見其義乎然與其窮原竟委而後知何如一見瞭然之爲善況有尋究而必不得其故者乎乃謂盡去諸傳而後春秋之義明何其謬也吾謂註春秋須將三傳及前編等書撮其記錄事實者列於逐條之下以補春秋之目然後另講書法以求其義斯聖人之微旨著矣至記言屬辭比事謂學春秋而得其義則能比勘事之是非斷以辭而親切允當非謂讀經者當比事而觀也至前略而後詳此隱而彼著由後遡前卽此推彼凡書皆然況春秋編年記錄隨其月日所有之事而繫之有一事而散見於各年各月者又有數事而相爲本末終始者自必博觀廣覽乃能融會貫通然春秋謹嚴一句一字具有精義如天地之廣大周徧脉絡經緯固自比密苟非逐字逐句體認真切又安能博觀廣覽融會貫通乎

春秋明天道修人紀撥亂反正辨名定分天子之事也天子之事惟天子能行之惟聖人能言之周衰王迹熄天子不事其事孔子作春秋言天子之事非事天子之事也論者乃謂孔子以匹夫假二百四十年南面之權謬矣亂臣賊子人人得而誅之誅之者正其罪也殺人者可殺非士師而殺之是亦殺人也以亂易亂春秋之所禁也然則所謂人人得而誅之者權在則誅以斧鉞權不在則誅以言也誅以斧鉞者天子也諸侯奉命討賊可也誅以言者凡能言者皆得而誅之亂臣賊子智巧足以飾非而謝過而言者方攻其隱而誅其心雖幸而苟免於身而一字之誅嚴於身後此亂賊之所以懼也或曰亂臣賊子天理良心滅絕已盡何有於一字之誅而懼而不爲乎曰天理良心如何滅絕得盡亂賊之人未有不諱其爲亂賊者孟子曰邪說

暴行有作邪說者暴行之所自來也桓之弑隱由隱之讓也惠公以桓爲適隱公亦以桓爲適桓遂自以爲適也桓方信羽父之反譖以爲隱將據位而殺適也是以弑也以桓爲適者邪說也又如闔廬之弑王僚曰我王嗣也僚安得立不知僚已儼然君也衛輒之拒父也曰不得父其父卽不得子其子雖子貢之賢猶疑之甚矣邪說之誤人也暴行之作由惑於邪說至陷大惡而不自知又或甘心爲惡而託邪說以自掩邪說不放則大義不著此孔子之所以懼也呂氏曰邪說暴行天下所同聞見而孔子獨懼焉何也手足風痺雖加笞箠頑然而不知痛無疾之人一毫傷其膚固已頻蹙慘怛中心達於面目人皆風痺而孔子獨無疾是以懼也春秋成而亂賊懼猶倉佗和緩療以鍼石血氣流注復知疴癢也故曰知我者其惟春秋罪我者其惟

春秋知者懼也罪者亦懼也盡天下之人無不懼則人心正而庶民興邪慝無由而作猶之倉佗療疾先驅風邪而後鍼石可施至血脉通而元氣復外邪又不待屏而自消矣

黃氏曰春秋敎戒之書而非褒貶之書也愚謂褒善貶惡正聖人之所以敎戒也善不褒何以敎惡不貶何以戒乎然聖人善善長而惡惡短情有可原雖罪必矜事有可取雖微必錄邵子謂春秋爲聖人之刑書蓋本欽恤爲平允堯舜刑期無刑之意也程子曰五經之有春秋猶法律之有斷例也又曰春秋百王不易之法乃文質之中寬猛之宜是非之公也自昔論春秋者無過此數言之親切蓋五經所言文質也寬猛也是非也酌其宜而準於中以合乎天理人心之公而爲百王不易之法者春秋也故曰猶法律之有斷例也

清儒學案卷四十一
春秋之法專治諸侯諸侯治則天子尊統一而分定上下各得其所而僭竊爭鬪之患息矣故曰春秋天子之事也然諸侯受治於天子而天子又受治於天芸芸者皆天產也而大君爲宗子故尊其號曰天王王尊也子親也凡所以繼天立極者無非奉若天道天子之事卽天之事也周衰王迹熄孔子作春秋昭王法明天道也

朱子曰聖人只欲備二百四十年之事若硬說那個字是舊史那個字是聖筆如何驗得愚案文以記事而義卽於是乎見孔子曰其義則上竊取之義於何取於文乎取之也若曰文盡從舊吾不知孔子之所取義又安在也舊史豈盡無當但微顯闡幽當名辨物非聖人不能是故有一字而兼數義者有數事而合爲一義者有逐字取義者有取義在一字者有以實字取義

者有以虛字取義者有取義在一事而因及他事者有取義不
於本文本事者有假之名而諱其實者有嘉其事而恕其情者
有著其功並錄其罪者有略其罪而大其功者凡此皆聖人之
筆雖游夏不能贊況史官乎一字而兼數義者如鄭伯假許田
許田也而可假乎罪公也罪鄭伯也然第曰假耳公非予也鄭
非取也暫假焉耳所以寬公之罪寬鄭伯之罪也曷寬乎耳凡
假物於人者將以還諸其人也此又聖人開二國遷善之門也
數事合爲一義者如文十八年子卒前書公子遂叔孫得臣如
齊後書夫人歸于齊又書季孫行父如齊總以明魯臣之謀廢
立子之卒卒於弑也逐字取義者如鄭伯克段于鄢曰鄭伯罪
伯也曰克力勝而去之也曰段路人也于鄢操之已蹙也取義
在一字者如一國以數國之師以者不以也以人與以於人皆